

Ինչպես հիշյալ հրովարտականները, այնպես էլ այլ աղբյուրներ վկայում են քրիստոնյա համայնքների, հատկապես հայ աշխարհիկ և հոգևորական վերնախավի հանդեպ շահ Իսմայիլի վարած մեղմ քաղաքականության մասին: Առանձնապես ընդգծված է նրա սիրաշահող վերաբերմունքը էջմիածնի Զաբարիա կաթողիկոսի նկատմամբ⁹:

Դա, ինչպես իրավացի կերպով նշել է Ի. Պ. Պետրուշևսկին, հիմնականում թելադրված էր շահ Իսմայիլի վարած արտաքին քաղաքականությամբ, որով նա ձգտում էր ընդդեմ Թուրքիայի դաշնակիցներ գտնել եվրոպական քրիստոնյա պետությունների շարքում: Այդ նպատակով նա փորձում էր օգտագործել նաև հայ վաճառականությունը¹⁰:

Արարատյան երկրում իշխող կրգըլբաշ ամիրների մասին հետագա տեղեկությունները հիմք են տալիս ենթադրելու, որ Չաղբաշի ճակատամարտից և 1515 թ. հաշտության պայմանագրից հետո, երբ Անդրկովկասն ու Արարատյան երկիրը կրգըլբաշները վերագրավեցին, շահ Իսմայիլը Չուխուր-Սադի վիլայեթը խոշոր ավատի կամ օլթայի իրավունքով տվել է Ռումլու մեծ ցեղի ամիրներին:

1517 թ. դեպքերը նկարագրելիս, Հասան-բեկ Ռումլուն հիշատակում է, որ այդ թվականին Դիվ-սուլթան Ռումլուն ասպատակում և կողոպտում է Վրաստանի արևմտյան շրջանները և վերադառնում Չուխուր-Սադի¹¹, որը հավանաբար նրա նստավայրն էր:

Կան նաև տեղեկություններ Երևանում Դիվ-սուլթանի կատարած շինարարական աշխատանքների մասին: Ֆրանսիացի ճանապարհորդ Ժ. Շարդենը թվարկելով Երևանի նշանավոր կառույցները, հայոց առաջնորդարանից ոչ շատ հեռու նկարագրում է մի ավերակ մզկիթ և նշում, որ այն «իր հիմնադրի անունով կոչվում էր Դիվ-սուլթանի մզկիթ»¹²:

Դիվ-սուլթան Ռումլուն շահ Իսմայիլի օրոք, նրա որդու՝ Թահմասպ միրզայի, դաստիարակն էր, իսկ 1524 թ. հետո, երբ Թահմասպը 11 տարեկան հասակում հոջորդեց հորը, ստանձնել էր պետության «վեքիլի» կամ խնամակալի պաշտոնը¹³:

Որպես նորընծա շահի խնամակալ, Դիվ-սուլթանը մեծ ազդեցություն ուներ և կարևոր տեղ էր գրավում կրգըլբաշների ռազմա-ֆեոդալական հիերարխիայում: Սակայն ինչպես վկայում են Հասան-բեկ Ռումլուն և Իսքանդար Մունշին, խնամակալի պաշտոնը շուտով կովախնձոր է դառնում նրա և Քյո-

⁹ Raphael du Mans, *Estat de la Perse en 1660*, Paris, 1890, էջ 274—275:

¹⁰ И. П. Петрушевский, *Азербайджан в XVI—XVII веках* («Сборник статей по истории Азербайджана», Баку, 1949, стр. 239).

¹¹ A chronicle of the early Safawis being the Ahsanu'ttawarikh of Hasan-Rumlu, vol. I (Persian text), Baroda, 1931, էջ 167 (այսուհետև՝ Հասան-բեկ Ռումլու):

¹² J. Chardin, *Voyages du Chevalier Chardin en Perse et autres lieux de l'Orient*, Paris, 1811, t. II, էջ 164: Շարդենի նկարագրությունից դժվար է հասնել, որ մզկիթը եղել է ներկայիս «Գյոյզ մեջիդի» կամ «Հուսեյն-Ալի խանի մզկիթի» տեղում, որտեղ այժմ տեղավորված է Երևան քաղաքի պատմության թանգարանը: Դիվ-սուլթանի մզկիթը հավանաբար լիովին ավերվել է 1679 թ. մեծ երկրաշարժի ժամանակ, իսկ նրա տեղում 1766 թ. Երևանի Հուսեյն-Ալի խանը (1762—1783) կառուցել է նոր մզկիթ, որն իր անունով կոչվում էր «Հուսեյն-Ալի խանի մզկիթ»:

¹³ Իսքանդար Մունշին, հ. I, էջ 47—48: